

حضرت عیسیٰ نے اختیار نہ بارے وچ سوال

20¹ اک دیہاڑے اسرح ہویا کہ حضرت

عیسیٰ بڑے عبادت خانے وچ پئے بنی اسرائیلی لوکاں کی تعلیم دینے تے اللہ تعالیٰ نی خوشی نی خبر سٹانے سن۔ بڑے مذہبی پیشوا، شریعت نہ عالم تے بڑے بڈیرے حضرت عیسیٰ کول آئی گئے۔
2 او آخٹ لغے، ”دسو! تساں کیہڑے اختیار نال اے سارے کم کرنے او؟ کس تساں کی اے اختیار دتا؟“

3 حضرت عیسیٰ انہاں کی جواب دتا، ”میں وی تساں کولوں اک گل پُچھٹا چاہٹا آں۔ تساں مکی اے دسو،⁴ حضرت یحییٰ کی لوکاں نا پاک غُسل کرنے نا اختیار کتھوں لبھا سی؟
اللہ تعالیٰ کولوں یا کہ کسے بندے کولوں؟“

5 اے گل سٹی کے او لوک اک دوتے نال بحث کرن لغے، ”آساں گے آخاں؟ کدے آساں اے گل آخاں کہ ’او اللہ تعالیٰ نی طرفوں سی‘ تے اے آخسی، ’فر تساں یحییٰ اپر ایمان کیٹاں نی سی آندا؟‘⁶ پر جے

کدے آساں اے آخاں، ’کُسے بندے نی طرفوں‘ تے
 آساں کی عوام بٹیاں نال ماری شوڑسی، کیٹانکہ لوک
 سارے تے یحییٰ کی اللہ تعالیٰ نا پیغمبر مننے اٹ۔“
 7 اس واسطے انہاں جواب دتا، ”آساں کی نی پتہ
 اسی پاک غسل کرنے نا اختیار کتھوں لبھا سی۔“
 8 تے فر حضرت عیسیٰ آخیا، ”میں وی تسان کی ناں دسٹا
 کہ اے کم میں کس نے دتے وے اختیار نال کرنا آں۔“

ظالم مزاریاں نی مثال

9 فر حضرت عیسیٰ انہاں کی اک مثال دیئی کہ آخیا،
 ”اک زمیندارے انگوراں نا باغ لایا تے اسی ٹھیکے اپر
 مزاریاں نے حوالے کری کہ آپوں کافی سارے عرصے
 واسطے کدرے دُور تری گیا۔ 10 جس ویلے انگور نا
 موسم آیا تے مالکے اپٹے اک نوکر کی باغے در پہیجیا
 تانکہ مزاریاں کولوں اُس نا حصہ ہٹی اٹے۔ پر مزاریاں
 اُس نے نوکرے کی پغڑی کہ ماریا کُٹیا تے خالی
 ہتھ اسی موڑی پہیجھی شوڑیا۔ 11 فر مالکے اک ہور

نوکرے کی پہیجیا۔ مزاریاں اُسی وی ماری گٹی کے بے
 عزت کیتا تے خالی ہتھ پہیجھی شوڑیا۔¹² فر مالکے
 ترئے نوکرے کی پہیجیا۔ مزاریاں اُسی وی زخمی
 کری کے باغے وچوں چائی کے باہر سٹی شوڑیا۔
¹³ آخر اپر مالکے سوچیا، ’میں گے کراں؟ اسرح کراں کہ
 اپٹے لاڈلے پترے کی پہیجان، شاید او اس نا لحاظ کرن۔‘
¹⁴ پر جیہڑے ویلے مزاریاں مالکے نے پترے کی تکیا تے
 اک دُوئے کی آخٹ لغے، ’اے ہی اے وے جیہڑا اس
 باغے نا وارث اے۔ اچھو، آساں اس کی ماری شوڑاں تانکہ
 باغ آساں نا ہوئی جائے۔‘¹⁵ اس واسطے انہاں اُس اپر حملہ
 کیتا تے اُسی باغے توں باہر سٹی کے قتل کری شوڑیا۔“
 مثال ختم کری کے حضرت عیسیٰ پُچھیا، ”ہن
 تُساں دَسو، باغے نا مالک انہاں مزاریاں نال گے
 سلوک گرسی؟¹⁶ او اچھی کے انہاں کی ماری
 شوڑسے باغے کی ہور مزاریاں نے حوالے کرسی۔“
 اے گل سٹی کے لوکاں آخیا، ”اللہ
 ناں گے کدے وی ایئے جیا ہووے!“

17 حضرت عیسیٰ اُنہاں کی تکی کے آخیا، ”فر

کلامِ پاک نی انہاں آیتاں نا مطلب کرے اے؟

’جیہڑا بٹہ مستریاں بیکار سمجھی کرے رد کیتا سی،

او ہی بٹہ ساریاں کولوں اہم ثابت ہویا۔‘

18 جیہڑا کوئی اُس بٹے اپر ٹھپسی او زخمی ہوسی، تے

جس اپر او بٹہ ٹھی کرے لغسی او پیٹھا جاسی۔“

19 جس ویلے شریعت نے عالماں تے بڑے مذہبی

پیشوانواں حضرت عیسیٰ نیاں اے گلاں سُنیاں تے

او اے ساریاں گلاں اُنہاں نے خلاف ہی پئیاں ہوئیاں

اٹ۔ اس واسطے او اُسے ہی ویلے حضرت عیسیٰ کی

پغڑی کرے بٹنا چاہئے سن، پر لوکاں کولوں ڈرنے سن۔

ٹیکس دیئے نے بارے وچ سوال

20 فر او موقعے نی تلاش وچ سن، تے اُنہاں کجھ

جاسوس پہیجے تانکہ حضرت عیسیٰ نے پیروکار بٹی

کرے اُنہاں کی کُسے گلے وچ پھساں تے رومی گورنر

نے حوالے کرن۔ 21 جاسوس لوکاں جائی کرے حضرت

عِیسیٰ کی آخیا، ”حضرت! آساں کی پتہ آے کہ جیہڑا کُج تُساں سِخائے تے آخٹے او، او سارا صِحیح اے۔ تُساں سچائی نال اللہ تعالیٰ نے دسے وے طریقے اپر چلٹے نی تعلیم دیئے او۔ تے کُسے بندے کولوں یا اُس نے عہدے کولوں نی ڈرنے او۔²² آساں کی دَسو کہ رومی بادشاہ اگے ٹیکس دیٹا جائز آے یا نی؟“

²³ پر حضرت عِیسیٰ اُنہاں نی چالاکی کی سمجھی گئے اِس واسطے اُنہاں آخیا،²⁴ ”ذرا مکی سِکہ دَسو۔ اِس اپر تصویر کُس نی آے تے ناں کُس نا لِخیا اے؟“

لوکاں جواب دِتا، ”رومی بادشاہ نی۔“

²⁵ تاں فر حضرت عِیسیٰ آخیا، ”جیہڑی چیز رومی بادشاہ نی آے، او اُسی دیو۔ تے جیہڑی چیز اللہ تعالیٰ نی آے، او اُسی دیو!“

²⁶ اے گل سٹی کے جاسوس حیران ہوئے تے اُنہاں نے مونہ بند ہوئی گئے، کیئانکہ او لوکاں نے سامنے حضرت عِیسیٰ کی اپنی گل وچ ناں پھسائی سکے۔

مرنے تُوں بعد زندہ ہوئے نا سوال

27 فر اسرح ہویا کہ کُجھ صدوقی فرقے نے لوک حضرت عیسیٰ کول آئے، جنہاں نے ایمان نے مطابق لوک مرنے تُوں بعد فر زندہ ناں کیتے جاسن۔ اُنہاں آخیا، 28 ”حضور! حضرت موسیٰ آخیا سی، کدے کوئی بندہ بے اولاد مری جائے، تے اُس نا پہراؤ اُس نی بیوہ نال بیاہ کرے تے اولاد پیدا کرے، تانکہ اُس بندے نی نسل قائم رہے۔“

29 گل اے اے کہ کُسے جغہ ست پہراؤ سن۔ ساریاں وچوں بڑے پہراؤ بیاہ کیتا تے بے اولاد مری گیا۔ 30 اُس نے دُوئے پہراؤ اُس نی بیوہ نال بیاہ کیتا۔ 31 اسے طرح دُوئے نے مرنے تُوں بعد تریئے پہراؤ بیاہ کیتا تے آخرکار ستویں پہراؤ وی اُس بیوہ جناٹی نال بیاہ کیتا تے بے اولاد ہی مری گیا۔ 32 اس تُوں بعد جناٹی وی مری گئی۔

33 ہُن تَساں آساں کی دَسو کہ قیامت آئے دیہاڑے جس ویلے اللہ تعالیٰ ساریاں لوکاں کی زندہ کرسی، او جناٹی ستاں پہراواں وچوں کُس نی بیوی سمجھی جاسی؟

کیئانکہ ساریاں واری واری اُس نال بیاہ کیتا سی۔“

34 حضرت عیسیٰ اُنہاں کی جواب دِتا، ”اِس دُنیا وِچ لوک بیاہ شادی کرنے اِن۔“³⁵ پر جڈوں لوکاں کی مرنے تُوں بعد اگلے جہان وِچ ڈوئی واری زندہ کیتا جاسی اُس ویلے شادی بیاہ نی ہون لگا،³⁶ بلکہ او فرشتیاں نی طرح ہوسن تے فر اُنہاں اپر موت وی نی اچھن لگی۔ او اللہ تعالیٰ نے چُنے وے بندے ہوسن، کیئانکہ اللہ تعالیٰ اُنہاں کی نوی زندگی دتی وی ہوسی۔“

37 فر حضرت عیسیٰ آخیا، ”اگر تُساں نا سوال اے اے کہ مُردے زندہ کیتے جاسن یا نی، تے اُس نے بارے وِچ حضرت موسیٰ وی اے ظاہر کیتا سی جس ویلے اگ بلٹے آلی جھاڑی نے واقعے اپر اللہ تعالیٰ فرمایا، ’میں ابراہیم، اسحاق تے یعقوب نا خُدا آن۔‘³⁸ اِس نا مطلب اے اے کہ او مویاں نا نی، بلکہ جیٹیاں نا خُدا اے، کیئانکہ اُس نے نزدیک تے سارے جیٹے اِن۔“

39 اے گل سٹی کے شریعت نے کُجھ عالماں آخیا، ”حضرت، تُساں بہوں سوہنا جواب دِتا!“

40 اُس دیہاڑے تُوں بعد کُسرے کی وی جُرأت نی
ہوئی جے او حضرت عِسیٰ کی گلاں وچ پھسائے۔

المسیح نے بارے وچ سوال

41 فر حضرت عِسیٰ اُنہاں کی آخیا، ”کوئی کِسر
آخی سکٹا کہ اللہ تعالیٰ نے پہیجے وے مسیح
حضرت داؤد نی نِسلان وچوں ہوسن؟“ 42 کیئانکہ
حضرت داؤد تے آپوں زبور نی کِتاب وچ فرمایا سی،
”اللہ تعالیٰ مہاڑے آقا کی آخیا اے،

’تُوں مہاڑے سجدے پاسے بیہی جا!
43 جس ویلے تک میں تہاڑے دُشمنٹاں کی تہاڑے پیراں
تھلے ناں کری شوڑساں۔‘

44 ہُن تِساں ہی دَسو کہ حضرت داؤد تے آپوں اُس کی اپٹا
آقا پئے آخنے ان۔ او اُنہاں نا وارث تے آقا اک وقت کِسر
ہوئی سکٹا اے؟“

شریعت نے عالماں تُوں ہوشیار رہنا

45 جیہڑے ویلے سارے لوک حضرت عیسیٰ نیاں گلاں
سُننے پئے سُن تے اُنہاں اپنرے صحابیاں کی آخیا،
46 ”شریعت نے عالماں تُوں بچی کرے رہو جیہڑے لَمّے
لَمّے چُغمے لائی کرے پھرنا پسند کرنے اُن۔ اے چاہنرے
اُن کہ لوک بازاراں تے گلیاں وچ اِنہاں کی بہوں ہی
آدب نال سلام کریا کرن۔ دَعوت آلے گہراں تے عبادت
خانیاں وچ اے ساریاں کولوں چَنگی جغہ اِپر بیہٹا پسند
کرنے اُن۔ 47 اے بیواں مَسکیناں نے گہراں اِپر قبضہ
کری کِہنرے اُن تے لوکاں کی دَسٹے واسطے لَمیاں
لَمیاں دُعاواں کرنے اُن۔ اِنہاں کی زیادہ سزا لبھسی!“

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تُساں نال گل
کرساں، یا تُساں نال دُعا کرساں، یا تُساں نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>